

Uttale til arealdelen av kommuneplanen

Som folkehelsekoordinator i Austrheim ynskjer eg å koma med nokre innspel til arealdelen i kommuneplanen. Fokus er på Øksnesmarka.

Eg ynskjer å syne til kunsekvensutgreiinga og konklusjonen som administrasjonen hadde vedr Øksnesmarka i 1.runde av handsaminga av arealdelen. At status vart endra til næringsføremål gjer Øksnesmarka forringa som tur- og rekreasjonsområde, som er viktig sett i eit folkehelseperspektiv. Også næringsareal og eventuelle jobbar er viktige for lokalsamfunnet og innbyggjarane i kommunen. Dette er positivt for folkehelsa og trivsel i kommunen.

Øksnesmarka har mange kvalitetar i form av spor frå farne tider som uteløer og torvmyrar, det er tilrettelagt turstiar mellom Øksnes-Rebnor-Årås og her er fiskevatn som gjev fine opplevingar og god fisk. Turstiane er godt merka og det er sett opp informasjonstavler ved inngangen til turstiane både ved Øksnes, Årås og Rebnor.

Ei utbygging av delar av Øksnesmarka til Næringsareal kan fort koma til å forringa dei kvalitetane ein finn i dag og som er viktige for innbyggjarane og besøkjande i kommunen.

Kysten og sjøen er viktige for Austrheim og alle som bur her. Mange ferdast i båt, også mange tilreisande kjem sjøvegen. Korleis ei utbygging på eit næringsareal i Øksnesmarka vil slå ut frå sjøsida er ikkje godt å sei på førehand, heller ikkje korleis ein djupvasskai med store båtar til og frå vil slå ut kan ein sei så mykje om, men noko vil endra seg for dei som vil ta seg ein fisketur eller ein roleg tur i båten sin.

Sett frå eit folkehelseperspektiv vil eg rå frå at arealet i Øksnesmarka vert ståande som næringsareal. I Austrheim treng vi Øksnesmarka som LNF Friluftsområde til glede for også framtidige generasjonar.

Austrheim, 15.02.18

Helge Dyrkolbotn
Folkehelsekoordinator
Austrheim kommune